

PHILIPPE &c. au Baillif d'Auvergne, *Salut*. Comme pour le grand prouffit de nostre Royaume, & des subgez, Nous avons expressement deffendu, que nul de noz diz subgez, sur quantque il se püent mesfaire vers nous, ne soit si hardiz de faire, ne de assembler tournoiemens, ne d'i aler en nostre Royaume, ou hors, & nous aions entendu, que aucunes personnes de vostre Baillie, puis nostre revenuë de Flandres dareniere, ont été as tournoiemens, contre nostre def-
fense.

(1) Nous vous mandons & commandons si estroitement comme nous poons, & sus quantque vous vous povez meffaire vers nous, que vous enquerrez diligament, se aucunes personnes de vostre Baillie, (b) Chevaliers, (c) bannerez, ou autres y ont esté, puis nostre dite revenuë. Et se vous en trouvez aucuns qui y ayent esté, sanz delai prenez leurs personnes & mettez en prison, & toute leur terre saisiez, & mettez en nostre main, sanz rendre, & sanz recroire, sanz nostre especial commandement.

(2) Item. Nous vous mandons que vous mandez & commandez, si estroitement comme vous pourrez de par nous, à touz Majeurs, Eschevins, & Prevotz, & à touz autres Justiciers de vostre Baillie, que touz Gentilhomes qui iroint, ou feront trouvez allanz ausdits tournoiemens, prengnent & arrestent, & leurs genz, leurs chevaux & leurs harnois, sanz rendre & sanz recroire, sanz nostre commandement. Et faites crier solempnelment, & defendre par tous les lieux de vostre Baillie, que nus, sus peine de perdre cors & avoir, de quelque condition que il soit, ne soit si hardi, que il heberge, ne reçoive nul gentilhomme allanz as tournoiemens, ne sejoiranz as Villes pour cause de tournoi, ne qui leur vende, preste ou donge nus vivres, chevaux, ou armeures, ne autres choses qui soient necessaires, ne ordonnées à fait de tournoi.

(3) Et faites crier & deffendre par cri solennel, que nul marchanz, ou autres personnes ne soient si hardi, sur quantque il se püent meffaire vers nous, qu'il ne meinent, ou facent mener par autres chevaux, harnois, ou armeures, vivres ou autres choses aus marchiez ou as lieux, où seront lefdiz tournois, Et se il advenoit que aucuns lefdites choses, ou aucunes d'icelles menassent as diz lieux, Nous voullons & ordenons que toutes lefdites choses soient forfaites & perduës à eux, & acquises à nous. Et si faites faire si hastivement, si solempnelment, & si diligament, que vous n'en doiez estre repris, ne puniz de nous. *Donné à Paris le Dimanche après la Thyphaine, l'an de grace mil trois cens & quatre.*